

曾文正公書札卷二十九

復馬穀山中丞

初十日抵江甯省接奉諭旨命閣下開府越中畱駐安慶籌辦一切比卽恭錄咨行慶抃無量頃接初六日惠書欣悉皖垣安謐如常英山肅清并蒙籌備援皖各軍米糧至以爲慰鄂邊賊氛甚重業經批令蔣之純迅速援楚兼顧皖境鈞陞等營已抵中梅河一帶該處難於辦米頃已批令鈞軍回駐桐城陞軍移駐六安皆爲易於採米起見并擬檄朱南桂駐宿松朱洪章駐太湖劉南雲駐安慶宿太皆通水運且係最要門戶劉則在省便於養病非有大股入皖不輕調出鄙見如此現尙未檄

行也此五軍皆須餉甚急請將皖倉之米竭力供支江外糧台
目下無銀可發弟憂灼之至嗣後擬將東征局之月餉鹽河華
陽鎮大通應解金陵之釐金江楚兩局應解金陵及鎮江之鹽
釐正陽卡北鹽之釐此四款者概解江外糧台充餉卽日分別
咨行刻下然眉之急則求閣下於司庫設法騰挪接濟以免決
裂閣下交卸藩篆後糧台釐局二事仍屈長才妥爲經理至以
爲懇英西林由西路漫水河移紮霍山境內稟請調駐六壽平
坦之地統兵頗多恐未必能回安慶遽履新任皖南肅清擬檄
易鎮於十月到壽春任朱令錫圭如回旌德之任聽候卓裁

十三十五等日疊布復函計達台覽連接四次手書敬悉一切
蔣之純援鄂甫抵羅田而成軍門大吉戰受子傷富都統馬隊
營壘失陷石鎮清吉赴援陣亡賊氛甚熾秀相咨調劉朱等軍
援鄂比以各該軍病者甚多目下只能自顧皖境難遽赴援鄂
中咨復秀相頃復抽調易鎮開俊所部北渡將來亦駐潛山一
帶爲游擊之師英霍兩縣有英郭何等軍分防當可自固樊籬
何紹彩進駐英山似有難色該邑辦米極難專供何軍猶虞不
給斷不可再添他營弟之令鈞軍駐桐陞軍駐六亦專爲易於
辦米起見并無他意平日得營一飽臨急庶肯出力歷觀行軍
不先算運米子藥者類多敗挫英西林現在統兵自難遽回安

慶接履新任藩司一缺或請穀山暫緩交卸或令小宗升署聽候卓裁穀山業經開府而督撫尙以札文施之縱渠或情願吾輩終覺不安如小宋專署藩司其臬司一缺勒道尙未服闋礙難派署博葉王三員均不相宜有吳坤修號竹莊者軍務地方均算好手曾放南韶連道被劾後又經累保至記名臬使諭以西北需人間過兩次弟以此帶勇相安故未令去或令張署臬司吳署皖南道或竟令吳署臬司均聽尊裁張擬於肅清皖南案內保實授皖南道目下則尙係湖南道員吳係布政司銜記名臬司尙非皖官二人皆不甚合例然勒道亦不合例目下擇員自以二人爲相宜祈酌之至廬鳳道缺前經函復請

於陳心泉馮魯川兩守中酌委一人已否札行心泉擬保道員
不日出奏孫琴西來信已由淮回籍偏親年老無意出山自是
君子之正道亦人子之至情畱營一節應作罷論蔣道英司及
出力各員保獎應俟軍情大定由尊處主稿會奏敝疏請簡
考官已奉諭旨卽著禮部改題爲奏迅速辦理具摺時倉卒
未及會列台端與少泉之銜此弟之疏忽伏乞恕亮安徽抵徵
一案頃已雙銜出奏抄咨冰案

復厲伯符方伯

國藩在江甯後區畫一切碌碌鮮暇江南鄉試定於十一月舉
行貢院比已竣工科場事宜次第辦理惟書辦殊少熟手各借

鄂省書辦乘輪舟東下不知趕得及否乞閣下力贊成之皖北
肅清卽檄蔣之純援鄂旋聞石鎮蹉跌富營失陷賊氛愈熾續
調介正等營赴鄂尙未起行接之純稟稱進兵蘄水會合成武
臣攻克賊壘大獲勝仗爲之稍慰介正三營前經咨商分別遣
散因鄂境吃重該營本係鄂軍勁旅是以批令西上援鄂不遽
撤遣據稟擬於九月廿八日起程旋接秀相咨據鄂台詳查截
曠銀兩飭令折算札行稟復據蕭慶衍王清泉兩軍稟稱實無
空曠敝處從寬批准非市恩也實見該二軍困苦太久目下立
見決裂如此彌縫以全體面具有苦心一則使該二軍歡欣而
去一則使鄂台今冬無索餉之苦其詳載弟此次與官相函中

閣下可一索閱介正三營尙屬鄂中勁旅似可不必遽撤蕭軍
欠餉旣由敝處全付將來應由鄂台還敝處者尙求設法籌還
至以爲懇

復彭雪琴宮保

前月十五日泐復一函計當遞到本月六日接手書兩件敬悉
派防黃廣擊退賊眾沿江稍安至以爲慰廣濟德令黃梅史令
畏蕙無能而德令演戲捏功尤爲可惡尊處旣已函知厲伯符
當必稍加懲辦厚庵回湘募勇赴甘肅餉頗鉅江西七萬已有
成議湘鄂浙蘇及東征局四萬六處以鄙人計之鄂粵兩處未
必應手湘浙蘇及東局四處當可得二十餘萬金敝處銀錢概

爲遣勇耗去除給途費外尙給此閒之期票與長沙之期票就
鄂省協剿金陵之兩軍而言蕭慶衍一軍遣散由敝處全給三
十七萬梁美材等一軍回鄂由敝處酌給六萬三千皆訂四箇
月交楚而舍泥弟所部吉中各軍則較之蕭梁兩軍欠餉更巨
矣劉朱等軍由宿太援剿蕪黃又不能不籌發行糧厚庵囑國
藩籌助八萬竟不能立時付去渠奏調唐桂生蔣之純兩軍西
征唐之行糧擬由此閒發三箇月蔣之行糧此閒與湖北擬各
發一月半此二款者敝台須籌十餘萬較之八萬之數有其過
之無不及矣之純援鄂襲擊羅田進兵蕪水攻克賊壘解成武
臣之圍羣匪下竄潛山霍山皖境吃重國藩添調涇防易開俊

一軍北渡擬以劉朱三軍爲前進之師而以李王易三軍爲後繼之師其梁美材王清泉等介正三營亦以金陵回鄂助剿不知果能力遏寇氛否厚庵以水師十營歸敝處調遣義不容辭其水師立營分汛務請迅速派定以憑具奏九舍弟十月朔已起程還湘途次當可接晤吉暉弟之濕毒與肝鬱兩者病俱不輕殊深焦灼

復吳仲仙漕帥

南漕概改海運自是天時人事窮變推移之勢承示江北各屬及皖北之由洪澤湖北達者先辦河運以免紆途運滬出洋而舊制亦不致全廢具見卓裁斟酌妥善弟雖主海運之說而亦

不敢竟廢河運蓋以北運河一水經數百年勞臣經營而成巨川豈宜以停運之故墮昔人莫大之功惟修造漕艘第意不欲太驟不欲太大不欲以例價責成旗丁自造太驟則無此巨款太大則難於浮送或者千里深通一節膠淺又增無數濬河之費責成旗丁自造往往一丁造船舉族斂費能趁閣下任內革此虐政爲幸將顧全此三者則江廣三省似不能不以海運爲主而河運僅堪爲輔芻蕘之見仍求切實指示爲荷本科鄉試已咨請蘇撫監臨少荃宮保來信定於月半前到此辦理一切宜春畬學使如已到淮請催其刻日渡江如尙未到卽將學政關防派員賁至江甯由少荃代辦錄科鄂中賊氛甚熾蔣道由

英山援鄂攻克蘄水賊壘解成武臣之圍鄂省東界已鬆皖省西界吃重比飭劉朱等軍赴鄂合剿而調涇防易鎮一軍北渡與鈞陞等營防守皖北爲劉朱後繼之師未知能否有裨

復彭宮保

疊接手書六件敬悉種種國藩亦有無數事件急欲熟商柳壽田曾充敝處戈什哈親兵營之立柳壽田及各哨官皆係鄙人自放鄙人現尙有兼轄水師之責乃昨撤柳壽田之委閣下竟不令其卸事一日離營一日亦不許其來金陵一行僅借成發翔兼管之名俾柳壽田任事如常此等舉動若他人以施之閣下閣下能受之乎閣下於十一年冬閒及此次皆勸鄙人大義

滅親舍弟并無管蔡叛逆之迹不知何以應誅不知舍弟何處
開罪閣下憾之若是來示謂國藩將兵則紊亂鄙人在軍十年
自問驍贖不至於此舍弟之賢否吉中營之好歹鄙心亦自涇
渭分明亦自能訪察外間之議論痛詆吉中營者以閣下爲最
此外官紳商民水陸各軍有貶吉中者亦有褒吉中者若如閣
下之所詆則安慶金陵之紳民必痛憾吉中營入骨髓矣柳壽
田明知閣下與舍弟積不相能而故重責割耳謂非有意挑衅
其誰信之吉中之勇既有所挾以凌人而反不說出營名露出
號補直待打畢割畢始行說出吉中二字又誰信之國藩擬於
十一月初交卸督篆挂帆西上仍駐安慶就近調度比之少荃

熟商已檄調劉銘傳等帶淮勇北渡隨剿并飭劉南雲等軍徑赴黃州追剿鄂賊德字營願赴鄂省歸李與吾處所欠之餉暫給三四千金作路費其餘在釐卡領取領至十月底止即可照此飭行敝處匱乏異常卽求尊處先墊三四千兩代發該營路費稍遲亦由戴分釐卡解還歸款熊令炳南之子被劫斃命一案尙有正兇未經緝獲許鼎臣等挈辦此案極爲妥速可嘉必須優保專泐布復

復喬中丞

淮南協餉前因鹽務疲敝月解三千本不敷用目下鹺事稍有起色尊處需餉甚迫應飭運司寬爲籌撥業照大咨轉行運司

矣統計皖北兵額六千有奇尊意以勇改兵先行全補該勇等籍隸本省亦無不願事屬可行惟皖北勇丁淮勇之隸少泉中丞部下者現尙出征未遽議撤此外各軍皖勇求其鎗礮嫺熟隊伍整齊者殊不多覲恐補足亦未必有益至皖省額定兵數八千六百七十三名徵調誠屬不敷然承平日久綠營兵丁實難整頓弟官京曹時曾上疏請裁額兵五萬近在行間閱歷多年益覺綠營習氣過深難於挽回將來東南大定勇丁全撤弟仍主裁兵之說不主增兵之說蓋平日養兵之餉雖少於勇一經征調出境則調兵一千較之募勇一千其費更多而數至千人必難湊十餘營之將弁以成軍臨陣殊不得力弟所以病之

而不輕用也遵赴皖鄂剿賊一疏奉到諭旨命國藩無庸前往仍駐江甯督辦一切已咨達冰案

復官中堂

頃奉環章敬悉一切此次秦豫髮捻合股東趨以援救老巢爲名實則窺伺漢皇德等處分投野掠爲鄂皖兩省之患仰託元老壯猶勦撫兼施寇氛淨盡餘捻敗竄不久亦當殄滅威棱遠耀珮慰曷任弟前奉會剿之命奏明移駐安慶六安得旨鄂事已鬆無庸前往仍駐金陵籌辦一切比已恭錄咨達並飭劉南雲等軍迅赴黃州劉銘傳等軍往紮三河尖弟擬親赴黃州一行面囑諸將妥商一切目前科場未竣李中丞抱病未能

遽定行期鄂中旣已無賊王清泉等營自應遣撤以節餉需厚
庵募勇赴甘需餉頗鉅函囑國藩籌助八萬敝處銀錢概爲遣
勇耗去除給途費外尙給此間之期票及長沙之期票實不能
應厚庵之求惟唐義訓一軍赴甘敝處須給行糧三萬則義不
容辭耳蕭軍遣資三十七萬有奇王軍遣資六萬三千有奇皆
訂四箇月交楚除長沙期票外金陵期票須十九萬餘兩之多
敬求閣下酌量速解若干弟亦深知鄂中匱乏異常但求稍分
敝處之重擔則爲惠多矣劉朱等三軍奉旨歸尊處調遣弟
已諄囑該軍等恭聽指揮惟三人皆係平行彼此不相統屬又
劉連捷之病近於內傷一軍不能獨當一路以後尊處如有調